



*Iesus guarit plusieurs malades : & iette le Diable hors du corps  
d'un aueugle sourd & muet.*

**I**ESVS ayant guarý vne multitude de malades, estoit suiuy de ceux de Tyr & de Sidon, d'Idumée & de Hierusalem, car il guarissoit beaucoup de gens atteints de diuerses maladies, tellement que ceux qui estoient affligez se fourroient sans aucun respect contre luy pour le toucher. Alors luy fut amené vn homme tourmenté du Diable, aueugle & muet, il le guarit tellement que cét aueugle voyoit & parloit, dont le monde s'estonnoit, disant: N'est-ce pas icy le fils de Daud? Mais les Pharisiens disoient, Cettui-cy iette les Diables en vertu de Beelzebud Prince des Diables: A cela Iesus répond, Que le regne de Sathan ne pouuoit durer, si Sathan est bandé contre soy-mesme: aussi Iesus montra vrayement, que ceux-cy parlans ainsi pechoient contre le S. Esprit, qui est vn peché irremissible. Outre ce, il leur propose, que d'vn bon cœur toutes choses bonnes en procedent, & d'vn mauuais toutes choses mauuaises. Pareillement Iesus remontre aux hypocrites, qu'en rejetant la bonté de Dieu, & méprisant ses graces, ils ont comploté avec le Diable, & quelle punition ils meritent par leur orgueil & ingratitude.

*S. Matthieu Chap. 12. S. Marc Chap. 3. S. Luc Chap. 11.*